



09972

溫寶忠先生遺稿卷一

明溫 璜著

錢子詩序

涇縣潘錫恩跋

齋坐東

人皆以利名爲累也而又無不資利名以爲人反若有多取累一分其人多一分之光榮者今蠅蠅蟻蟻皆求有累者也而或遭時不然所求之累未必來而先以求累亦有逃之御之而不得則必借一境寄焉以壓之寄不工則借亦不力所壓之累未必去而又以寄累何也人在世不能無賢愚貴賤之殊譬如布奕算子各求敵道以致降服若有勝我一道兩道者我見之負愧如山彼亦坐我百尺樓下而憑凌之故無論所求所寄無不各以所長輕所短卽就詩論之效體於葩伐材於選運有古今盛晚之變調有箴銘歌詞古風絕律之區韻別垣元字分母不兩不登韻壇雖甚不乾坤正氣集 卷四百六十一

解者苟執此以繩詩老師宿儒無以應則安得求之可不勝勝之不爲累也吾友錢子名利無所累於世勝負無所累於心混於俗不諧俗號於儒不賴儒好爲詩不名詩長於錢水遷於滄之東陲十九在外十一歸家碎玉鳴風自起自止於其詩惟錢子眞無角勝之心故隨意所到非求亦非寄豈其無超然於青霞白水者以有當於心哉余益信其爲無累人也以無累者視其人視其詩也余自束髮來匏落氣志年已過立不能處通顯立榮名又復結寒聳牙於古今詞日悶不得快常恨此累當何時消歇見錢子便思東海箕山不遠云

掃塵集序

自超生而灑灑長而蕭蕭壯而赤赤地無長物青山一區古囊一卷是名塵乎是名非塵乎自超爲人胸舌洞了如囊口底有物覆

出其於父兄弟親故排患釋糾一往奔詣蹶則蹶耳不耐狐猶  
態錢刀散盡還念復來而憚於需徐積累當其飢寒切膚鬼輸天  
兩猶以爲遲稍緩則或一觴一石意有所至忽忽焉曠而忘困其  
胸中何處著滓穢耶余與自超結社數年矣視其心脇膺有不可  
一世周旋作我之意十年以來自超袷見肘瓶粟見底產見錐而  
篤全所好窮水見源搜山見骨知交見肺膽骨肉見根芽文章見  
性命雖謂返之本來無一物可也蓋自超生而具之者真厯所遇  
而得之者深彼其壯遊兩都契結名儁已而負笈富春山已而嘔  
血走金焦倦遊則買居清遠樓莊羣峯揖翠已而愛桃丞築東偏  
綺閣千樹燒丹已而愛竹入棲賢塢構鴻角山房萬青夏玉已而  
愛梅卽其趾結廬招雲載鶴挈妻子往巢焉故其人雖牢騷屑瑟  
未可一世而熟習夫煙霞川岫之氣幻靈明媚手與心成今茲集  
乾坤正氣集

卷四百六

二

具在也自超嘗呼兒子熒曰我已燒卻筆硯作蒼弁碧湖長青緗  
事付汝矣非嗜榮也延先緒耳而長君熒蜚聲菽菹成乃志且  
簡其別集掃塵發匣而梓之非自超意也夫塵以掃塵塵亦塵也  
昔有衲舉拂子和尙問曰作麼生衲曰掃塵和尙曰又卻是一點  
也自超其證此義耶灑灑乎蕭蕭乎赤赤乎自超哉

送洪復初序

復初洪公行年七十餘而有嬰兒之色風塵厯有年所宜善刀藏  
之而脂轄四海之志不少衰古之得道者或龍潛福地或雲遊八  
荒皆以見道爲本至道不可語示必將寄之以術或以劍或以丹  
或以方技藏形蔽光遇其人水乳合盡舉生平付託之而後乃可  
筌其術而蜕其身黃石素書以兵法傳實不僅以兵法傳得孺子  
而圮橋之履不再進李耳五千言宿具爾得關尹而青牛之跡杳

如矣天下之知復初者皆非知復初者見技不見道卽見道而無能爲其傳有得其傳者復初乃可以隱復初印天下以道名以道天下畏而不敢近故負篆以遊雖然夢夢者視蠶頭燕尾鳥跡柳葉之文如象胥之不可理况進此者乎篆籀與六書爲本原六書與八卦相表裏八卦與造化爲彌綸制而用之存乎法神而明之存乎人神明則形而上矣或繇道以通技或因技而徹道兩者皆可以傳公行矣海內有占星望氣者流積雪沒脛跪而求道使盡出其生平幸公母太靳

壽家少師六袞序

吾兄員翁先生爰立旣三載誕登六袞余小子介瀝酒望長安效封之三祝祝矣而不必盡與封同其辭蓋古以迂禧也今以考祥禧以占來則懸符繇造物考以賓實則種德在生平德以配命矣

乾坤正氣集

卷四序六

三

而畫君子之素以爲三斯何說之稱大抵聖賢之道與時委蛇神龍縮張動止無方難以一德槩也請得而言之往自萬歷三大役以還邊腹雍容口風口雪俱消殿虎野龍不角聖天子深居百僚坐嘯先生起家金馬壯志自吞俯念明時直不須我我將老桑梓棠棣之鄉矣乞差乞外十五在南十五居家高堂會慶子舍斑斕惟牽介弟潔修甘旨爲壽先生豪致如九齡風度東山神韻不無名花沾醉紈扇遺詩然必課以朝夕上食之隙不以隙雖卒不歡至今悲蓼如生分荆一體豈可勉而至哉二十餘年之間脂膏者噲爲拙宦川巖者引爲仙史坵壇者命爲騷才似之而非也書紀升聞先之以克諧詩詠爲憲終之以孝友先生忠以孝基此爲一節先生之眞文章先生之眞理學也時移運往器久蠹生鼎湖再泣綱紐倒持籬犬磨牙與隼邁羽先生以貳禮臣次直講孽璫從

旁目攝者久之無何而先生計奔君側之毒沸掃君側之毒者亦與糜爛借使先生不計奔其不爲楊左竈突哉乃先生謂天下之患有甚於此朝廷無至忠匪躬之節盤據名要招羸蜾長子孫內鬻天賞外賣國威其心律以無將乃不翅一旦新聖當陽海內更始先生不愛膚髮以身當天下之衝發奸一疏雷怖海宇儔黨着黃失措攢鋒飛矢口不擇音天子心其忠加護焉而城下之恥復作閣部省臺嚙聲先生嘿以片語悟口主口口恫惕宵遁期年之內輦肅邊清覆地重萌掀天再翫誰之力哉此六七年更爲一節是先生之真節義先生之真功業也霧散霾空孤忠炯曝天子夜半降白麻召入直旋入賜袞玉累封蔭奏稱捷桴鼓倚姁金湯世以知先生之儲篤眷者久也往黨人始以仇繼以睥睨既而以揣揣先生當此之足揚而視疾廣已而造大也橫於江陵瀕於永嘉

乾坤正氣集

卷四百六

四

或孤極而轉思桃李寵大而翻妬入宮先生拜命飲冰約身惻素嘆暗善類靡有隙藏事權歸長曹議論還言守威福稟一人所可與天下共信者手刺葵茹影逃薏苒獨抱至孝孤忠不甘與實恩辱國者同槽共櫪之一念桂老彌辣金鍊逾剛直欲普此念與內外大小臣工並照下罔二心上咸一德此一節苦衷可與明兒難以告語此又先生惕若之龍德亦先生篤恭之靜理也絲斯以談世所稱敦養胎元以迓祐眷者氣平則母滋以擾遭運恬熙歸根返本是故舜且皆以孝弟基祥同羸百歲吾爲之誦闕居壽也脈憤則母閉之邪丁時否隔鍼艾過施是故逐觀攻瑾二劉罪著而文貞文靖同享上年吾爲之誦大田之二章與卒章一壽也神旺則母益其驕二曜厭盈高明召矚是故畱鄴二侯機沉識渺轉幹未形鄴既不好仇人而博浪之椎徐化赤松子房至今並擬神

僂吾爲之誦樂只三壽也驗往徵來與封人厥旨不殊是爲小子介之三祝

壽明翹董公五表序代

古者燕享伏臘羣賓主各以卮酒跪而壽今五十始稱觴是古之爲壽密而今畧也古壽無帑文然或祝其令聞碩德堂構箕裘皆壽也今但敕長生是古之爲壽廣而今隘也明翹古之賢豪間者哉偉幹慨慷周急然諾不畏強禦鬚眉戟戟然而中有飄舉物表走脫名利窩想余乃得而祝之余嘗聞其慤承先志伯也吹埴仲也吹篪伯曰予卽田工功仲曰予有禦外侮誰無兄弟相好無猶余羨之敬之匪但已也妻兄弟往來匹也常有秦輸晉粟三施不報之隱念宗族兄弟貧乏勢也力請命於富室至召怨而興師又以身翼蔽貧者至犯吏議而不悔余常目壯其事此豈齷齪拘攣

乾坤正氣集

卷四百六

五

子所能卻懦而勉義哉若夫小星在列猶齊中饋之眉愛女傳家愈篤有兄之子是非聞道者而能然乎古之以令聞碩德爲壽者其一徵也王無功天下士也而別築河渚豈必有所慕利如今形家者言哉謝世羈而便身曠也明翹新課東臯中田有廬鋤雲餌月坐匡牀而發蹤酌習池之槩菜書履道之遺此其大志然已乃斯干以咏落成而寢夢來熊羆之兆有聲以頌遷卜而豐鎬詒燕翼之謀是子孫常發祥於宮室益良爲少男與門闕應而圖數五爲衍母十爲衍子是五十又與子母應驗之往册符之理數古有以堂構箕裘爲壽者又一徵也余小艸無似硯田甌脫久矣前者羣小投螻時爲幼真作五表文今入直殷繁又作明翹五表文是烏能盡意意所不能盡者他人舉之特念諸君聯鑣獻棗之日黃菊簪頭丹楓照眼白墮香輕紫鬢螯重接離歌墮履烏交加壽

散飛刺陣爲樂亦還念我白髭老長卿彳亍雞鳴帽薦朔風之  
沙屨糾曉月之霜也哉

壽涵翁老叔七表序

涵翁天而人者也非人而天者也有人而天者如名貴巨卿近天尺  
五憂讓異譏雖謫仙爲前身修文爲後影不越世網淨沈耳天而  
人者如渾茫初破左羲右黃浩浩胸坎別具桃源吾乃不得而名  
之翁誠全於天者也請頌言其天翁天資疎爽好爲搜神問奇之  
學過輒成誦不求甚解作文下筆不加點質任自然悉成天籟早  
歲蜚聲人視翁一第猶承蜩而掇之也屈指豫擬榜未發往往爲  
捷報人蟻擁去而翁泊然旣黜見返而翁又泊然喜愠不形饒有  
天趣當其天機之啞喪海鷗狎主雖畊夫牧豎莫不嬉遊而雜處  
及乎天性所激砥石難移雖以嚴檄星火臨之而屹不動翁所謂  
乾坤正氣集

卷四百六

六

得全於天者也全乎天者不過周乎人事先人之做廬可託翁以  
一木撐之祖業之舊疆未蹙翁以一雌守之園花時發繁陰不翦  
以當茂叔之窗艸也好鳥鳴春良朋話舊以當五柳之無弦也家  
常小蔬輒復言佳其以晚食當肉也對客不飲洪鍾乍鳴其以鄰  
架當孔尊也無聲無臭重僕歡迎若呼猿鶴而驅使木石也大約  
翁之胸懷蟬蛻不染無意人世而翁究亦受無意之報夫翁雄才  
挫於短髮晚業淹於過庭於身太遲於子尙早而竟以似舅一脈  
旁發跡於延陵天之報翁者一也伯禽受撻曾參喫杖雖以賢聖  
爲之猶難免於義方而翁晚年弱息爬搔恐拂卒之慧業夙成天  
之報翁者二也翁門多長者之轍實無攀炎附灼之骨忽焉異姓  
窮交一旦聯姻虎變天之報翁者三也翁之尊人曾以塵埃具眼  
結文定於龍門未額之日而翁亦從雞窗龜勉時見知於文寧政

府長卿宗伯並相引爲典刑天之報翁者四也凡人事重則天韻薄而事亦或厭人而去之天韻深者天每迓而集焉天與人之故豈淺鮮哉

送無聞上人序

渡江無義識者謂之救饑古德云老僧除三時粥飯是雜用心謂粥飯非心無有是處夫龍象現身法供罔給此則吾黨之罪也宗風旣渺聖胎不育昔人一把茆龜千家飯鉢伴虎狼而目不矚者今化爲隨磬三餐眠雲一榻檀施膏血長養游閒此則禪那之過也祇園上人無聞者青年韶秀慨憤未流遂發三載禁足之志一時氣魄直可壓倒飛來夫厭脫塵凡買山而隱旣山矣又恐不深而逃剝啄旣深矣又設扃關而戢形影請問此時作何願力且夫閉關者正閉五根六鑿之本無寫經者正寫自性元明之本有白

乾坤正氣集

卷四頁六

七

雲不倚青山明月常懸古澗請問此後作何果證蓋兩者雖無聞之所自量而亦吾黨之責也昔有長者供養一聖僧偶一日齋稍遲長者不見聖僧但見餓鬼聖僧蹙眉曰餓鬼卽我我始入定忽饑思得食遂變相耳聖僧因此遂誓十日入定不食長者不知也朝夕上食如故見聖僧得飽如故聖僧笑曰得飽非我此是長者供養虔誠自見性中聖僧耳若此可謂施受兩無負矣夫自有佛法以來無論隋王通唐裴休李翱諸賢輩卽昌黎亦止折朽骨而障邪師耳和尙但圖佛性檀施不乏婆心勉之勉之

訪理安上人序

佛日以一笠發跡理安者四十年所矣理安舊爲伏虎禪師棲錫故趾湮沒於宏治辛亥構復於萬曆辛亥興廢之符誠有因也寺有九峯環翠背大鵬而面螺髻而卽以鵬之兩翼分龍虎菁葱腋



張勢若飛而猶翥者螺髻與寺所塑三世佛日作賓主酬對時從  
清夜望月月從螺髻上轉輪而出如頂相圓光孤明遍照亦奇景  
也寺之水雙澗合流而澗之支係者不勝數相傳爲十八澗以澆  
帶之而佛厨之所瓶供而鑊煮者又不絕於澗殿左一窟覆石乳  
滴酌以烹茗無色而有香厥名法雨是爲南山第一泉也余從楊  
梅嶺步訪之山腳欹曲凡六折而望見寺影澗與路纏如錯繩股  
數里內無誅茅者而一區梵宇巋然樹杪此時塵心早冷無俟揖  
佛日而話無生矣

文體策

今天下不必問士習也。文體而已矣。士與文係國之所重。重人則文爲人文。而文與盛衰重文。則人爲文人。而人依隆寬。今重文莫制義若矣。今制義之文。豈聖祖開天制義之文哉。聖祖經緯三才紀綱百代。勒爲科目內外三場。體格多條。要之明經答策。通理達務。表裏淹敏。作成經世偉人。是故浮郁非初也。昔者唐虞敷奏以言矣。上洞知人之哲。下廉明試之功。而其時猶有靜言庸違之凶德。成周選秀。書升要。皆平時讀法。素察其孝弟嫺睦敬敏任恤者。而豫采之。卽後形求卜。載負鼎射鈎之士。未嘗以語言文字見長。漢文隆於孝武。無不奉使口口宣猷。郡國而腐史滑稽之徒。詆嘲

乾坤正氣集 卷首上七

一

左右俳優戲畜。不得比嚴助等。取尊官明所重。不在此也。我國家制義之壞壞於進取利祿懸餌。詭遇迎新文運鑿空。離物爲變人。與文離而人波波焉。幾不能以自主。故人謂文體係於士習。愚獨謂儒行之壞壞於制義。何也。我朝科貢而下。原有孝弟才識賢良。方正諸科。以相佐。今止制義一途。不借足於他徑。而文始逾涯。無有束其勢者矣。絕裾捧檄。帖帖爲榮。扶杖肩隨。兒童知愧。父兄服牛荷擔。子弟叱咤。而柳榆之以爲爲文。當如是也。相如挑鵠。怨之槩畢。卓抱狗偷之糞。高陽北里。不者名腐。以爲爲文。腐果不如豪也。揮金鬪蟀。散盡復來。擲帽呼盧。剝膚有膽。屠沽狗盜。不者名林。以爲爲文。株果不如俠也。彈鋏長鳴。錐槩寫怨。白面弔長沙之醜。枯髯燃銅柱之灰。以爲文。不騷不激也。買譽登龍。垂名遊鬼。呼吸死黨。馳縮地之車。把握侯門。掣彌天之肘。以爲文。不廣不遠。通若

是者敵中於人矣以爲利歸於文也遂不惜傲其人以從之則進取之文誘之也文之病可得而藥矣今欲救文莫如攬其柄於上而弗使下移自北地信陽之壇草已宿今所推爲丹鉛宗匠者皆青衿子也年淺善搖地卑易和權輕必分唱和轉徙十年四變莫適爲主今必如昌黎唱鐸於成均歐陽秉衡於棘舍綱紐一而燕郢稷下之譚自廢也又莫如清其途於燕而弗使旁亂自學鮮崙門童子居位稱師號長操縵未能災黎速化吳歛稗說穢亂疊宮始以啖名也繼而啖利一人而數集一書而數名收不勝多而覽不欲竟今必擇有裨於功令者嚴尼魯之刪操戈於正學者付贏秦之火榛荆闢而聰明性命之位自正也今欲救文莫如陰佐以賢良方正諸科如一孝弟也上之所貴下之所賤何也貴必有貴之道晁錯論貴粟貴以其粟爲賞罰今莫如歲科以爲劣優察

乾坤正氣集

卷四十七

二

典以爲殿最齊民亦得以博衣冠而贖罪戾則人懷君子之行而言藹如矣又莫如實核以明經答策之要今文之禍獨中於書何也主司圖便而右書羣十五國弟子三載肆力而射書書有餘力而妖作也賈誼之策七國也莫如衆建諸侯而少其力今必分其力以治經主司之攸好存焉參其力以治策主司之攸好存焉書之氣不鋤自平矣且今日制科之策義卽異日納言之奏義也降中數言沒身不易苟其中有明習事典通曉世務者遴選數條別函副本恭呈聖覽照例知部卽與施行天下明知朝廷所向不揣書義而雲物輿圖河渠司馬兵法之學不在部寺而在膠庠矣夫如是而胡瑗之條教乃可列於學宮也故士不能離其人以爲文吾乃可因其文以覘人也夫如是國家何必不重文

愚按財之源出自農郡縣近源易相畜恤是故善理財者先理郡善理農者理郡縣此百世良法也今之郡縣卽古五等古者諸侯各自保其境內天子總程秸粟不出五百里外豈復有他奇贏哉自宏羊劉晏安石皆以公卿身析秋毫儒者所不道而三人本末則自有辨夫均輸平準至纖悉也總其術不過籠天下鹽鐵諸貨物官自爲貴賤幹灌之而太宗以來三十取一之規固自在劉晏亦以鹽輓緡錢爲務權貨大旨與宏羊同實未嘗尚視楊炎兩稅眈眈攢吮於其中且國家治商賈郡縣自治農亦未爲兩失也介甫不思本計瑣屑諸條非出息卽賠償哉守令奴隸兩府何職之能圖今國家何以異於是物力詘殫災祲狎至譚者鏤空任者畏影議鈔鈔之難自上行也議屯屯之召募牛種未易土著乃粒也議鹽鹽之積引窩販難清也議鼓鑄鑄之收銅盜冶未就約也議

采取取之所得不償而封山借寇也大司農乃始聚族而謀加派之法舉衆輕收積少燂肌銷骨而不敢譁而有司無至忠憂國之圖剗揚奏竣以爲能火羨與正供同征大倉與官囊並滿是大臣教之偷而下大夫以下不忠之甚者也民有不思亂者哉愚故曰善理財者先理農善理農者理郡縣以此也夫欲理郡縣以理農莫如郡縣之自爲力而上無以涇束之上束之則胸不展采若人情之自爲力者上不能使之然亦不能使之不然也愚是以有三說於此凡民可恩誘難以威劫古者下車除苛推析至隱遍巡鄉邑周瞻曲處罔有卹勿明詔督臨匿不與民間羸者還元焦者沃澤此其事近仁而可行行之三年上諒其無所爲而爲之衷下諒其無得已不已之事猝然有急未有不擔車麈至者也且夫相索則交征嗇守多餘地古者有司躬操約素不以妻子自隨至則壤

府壁舍發蓋藏御麤糲衰損民間喪娶社燕亦無公私間遺束修之餽此其事近義而可行行之三年官儉金一金民間生金十倍官民儉粟一鍾田間生粟五倍民十萬戶羨餘可計算數也晉陽保障繭絲之所自出哉保保其中藏障障其外至日願以其身告譴於天障堤於河待罪金馬門而必不令蛇虎近田間一步此其事近勇而可行行之三年杼譴篋忌蓋民亦藉以金湯焉夫仁義忠勇之說明旨非不懇切也日與之簿書期會所求在彼所責在此士鮮根抵之行脂窟成風獨立慙自異奉令迫趨繩上下蒙狗安於苟且若力勉此三者人植法興行一邑邑効行一郡郡効卽準而行之屯田鹽鐵采取諸曹局其弊安有不立起而利歸朝廷者哉愚故曰善理農者理郡縣斯其人之理也顧此三者上必以十年作率而廉弊之下亦以十年董訓而肅先之士無異學官司

乾坤正氣集

卷四十七

四

無異指而後農民始得有其父母妻孥愚故曰善理財者先理農得其人則理也故重農自三代以來未之有改也重郡縣自秦以來未之有改也鹽鐵無論已屯農表裏也一盛於漢元狩再盛於唐天寶然皆法緣事罷丁隨兵撤而獨農與國家同旺衰漢以列侯領郡國簿唐以宰相兼度支旋設旋廢而獨郡縣與農相終始且農失而後徙業五方誠治郡縣則必芟放冗食遊食如史胥皂隸徒手走空者若而人誠欲清理屯鹽采鑄則必有汰老弱禁私將白望奸傭積盜者若而人前有驅者後有納不惟納之又將招之招納無所則諸曹鳥獸散而復聚是故農者天下之鑿也使有仁義忠勇釐肅屯鹽采鑄以爲之驅又有仁義忠勇愛護井里以爲之招四民安業廬畝囤積尙遺宵旰爲哉愚故曰財之源自農非誣也

易稱知盜唐虞亦有寇賊奸宄之戒人能固豺虎之防而或失投懷於蜂蠆何則傲於大而忽於微常也古國家之受患者或在邊或在腹莫不有狐鼠之隙芽蘖於其間是故赤眉甫別而更始興浪死遄歌而洛倉散潼關破而白馬旋投京東寇而北轅兆鬻所以白晝大都剽吏奪金賈太傅援與蠻夷七國同類而涕道之此今古數千年盜賊之大勢也今國家所患者口耳卽倭不登萊緩議何況盜顧從來邊海突籬未有不肇於奸民勾引入則幕參肺腑出則鄉導爪牙鬼蜮蔓索之莫得此祖宗三百年盜賊之大勢也年來流賊狃猖秦晉蹂躪江淮且地震天威風靈靈電所在見告桴鼓同聲招搖同氣此宇宙凶荒盜賊之大勢也閩浙之間濱海渚溼轉展挺險抗損官兵匿形見影我無犄角之固彼有三

乾坤正氣集

卷四頁七

五

窟之藏此今日盜賊未定之局也綴倭者恐其東合而連於口逐寇者恐其南走而合於倭饑民寘子椎埋屠賈者流借酷吏蠹胥之名蒙豪奴勢戶之號緣聲附響需十指招耳此異日盜賊必至之局也則是豈不可爲寒心哉圖之此其時矣夫事未然而慮火積薪則迂而見遠事已壞而罅寒衣初則泄而寡効值此機張括發之候滅趾殞牙事半功倍及身而竣無累後人此則當事者之責矣愚以爲賊當以賊之道付之一方之物力弗全逞懼其逞而斂脂填壑也數郡之人才弗輕擲懼其擲而聚珠抵雀也就事論事計惟有解散之一法知賊之渠帥主名腹謀要領當如虞詡召賈惡少同黨誘捕今之能爲朝歌方略者有其人乎知賊之陸巢何向水寨何趾當如張綱躬詣賊壘曉譬歸命今之能爲廣陵恩諭者有其人乎此之不能而僥倖於一戰其不可嘗試也必矣夫

醜醜之所誅鋤不廢儻其間謀未精拳勇未練則奈何一戰自雄  
橫連誅殺萬一好事者急鼓輦貪功者詭首級則奈何一戰小勝  
遠報凱旋且其俄人俄獸條錘條鋌忽而蟻聚忽而萍散則奈何  
一戰驅之境外遂以鄰國爲壑也故有咎正統之撤舟師愚以爲  
破之海外不如禦之海上亦有議汛更之無常伍愚以爲老弱廩  
廩不如土著驍募就今論今計惟有屯守之一法撫鎮道將抵賊  
所指郡縣嬰城收保人自爲守也温台定海延海基垓畫水戒嚴  
地自爲守也張義旗者練士馬習火器牌笮之教修軍實者積穀  
要器具干櫓襖械之需事權自爲守也然而守令要矣今日名寇  
者偶也張喙爲敵戢羽爲良非守令莫與仰也今日議戰者暫也  
事前區畫事後機宜非守令莫與恒也蓋郡縣之所爲者極難耳  
閉關收保一以闌猾敵之內攻一以遏亂民之外誘撫馭一不當  
乾坤正氣集

卷四百七

六

是大憖起於肘腋而赤子接踵強暴也是故善爲守者籍冊魚鱗  
法聯保甲做管子內政軍令之遺爲軌爲里爲運爲鄉熟險要祭  
叵異村氓里黨晝識夜聞鄉長州正臂指狎使賊伏則泐作漁獵  
以佐軍需賊來則堅壁清野以憑保障當是時也衿紳講忠義之  
條亞旅識同仇之誼則向所謂酷吏蠹胥豪奴勢戶者束矣簡其  
饑寒流徙者予之餼以給工役選其魁俠落魄者試之伎以程超  
躍則向所謂饑民窶子椎埋屠賈者杜矣內變不生鄰交益固則  
向所謂秦豫閩粵之交訖者漸且衰止又奚患赤眉黃巢之屬貽  
漢唐宋之烈禍哉是故盜可解而不可除也利堅守而不利速戰  
也宜爲百年清狗鼠而不宜旬月邀功賞也

溫寶忠先生遺稿卷三

明溫 璜著

涇縣潘錫恩校

明故資政大夫南京工部尙書贈太子少保泰垣沈公神道  
碑代

公諱儼字永叔號泰垣居歸安之竹谿里爲贈兵部尙書玉陽  
公之叔子今贈太子少保子祭葬而俟身名之典者也登萬曆己  
丑進士初主事工部管盛甲廠丙申服闋補儀曹筦冊庫已擢闈  
學憲三載遷參政分守又三載按察使分巡歷閩藩臬凡十二載  
壬子服闋起部補右糧儲江西遷左布政河南尋舉卓異卿光祿  
己未以副都御史撫雲南辛酉陞南京兵部右侍郎旋晉工部尙  
書以忤璫歸崇禎辛未卒贈今銜公別歷中外垂四十年在所勞  
績士被服其仁義居民佩德遠口効順余深維國家材辦之難幾  
乾坤正氣集 卷四十六

一

痛惜典刑之莫再爲稍次錄其槩公以世家子夙望韜時譽比服  
官幾於古人強仕循資外轉無速化口不言保境功身砥媚頌之  
類波拂衣從里父老社賽爲樂公之出處去就何嚴以潔也公治  
獄準以平恕出納鎮以公清如延平殺人之暗證光澤邑丞之誣  
嘔理寃直枉多此類至如盛甲不榘漕儲有方以至開封之派補  
宣府之參罰六詔之貢金三殿之搜括一以故事裁之公之理繁  
治劇刑名錢穀何法以廉也公視閩學公慎明鑑衡絕干託息告  
訐至今林樾志一案八閩尸祝之奉使滇南丁蕎甸之寇未幾而  
水西之難踵作公拮据出萬死一生兵餉罄空勦撫無轍迹卒用  
以劄胥尾梟段高計敗安羅當是時或移檄整兵或曉以禍福或  
立五營以扼要地或守門戶以安堂輿撫不忘戰戰不忘守黔不  
能軍而滇勞師費餉以底定之滇已謝事而爲滇條便宜開功名



以永固之至今滇功一案未及償夫隋陸絳灌素斬才偏公之案經武緯何隨施輒宜也公之處稅監也以壯寧坐主謀不以辱弟子其處租使也以與陽查奏陰遣之行其處誅索畱工也以遞祿可捐官可閒住故地方不受虎冠之驛騷亦不受困獸之激害夫貂璫狐鼠自古難之何公之不惡而嚴也光廟龍潛光祿供奉加勤能體兩朝至意神廟末年輦下嘯諾能自奮軍功於天末又能請蠲謝乞具畱工出入之數於熹廟竈煬之日無少避世運遞更厥操罔二何公之確不拔也今天子聖明百工熙載而余憂方大方惴惴焉田間草澤中英雄伏處是懼蚤夜亟需公而公轉棄子而長逝公長余二十年孝友行學余童時耳習其當言才節彪炳宇內者身親見之試揭其大者使天下慕公效公平反出納如公卽竄絕刑清衛士如公士文行絕纖趨解紛戡亂如公口口流寇

乾坤正氣集

卷四十六

二

以道難進易退之風如公吏以植綱維太平不足俟也嗚呼俟太平者可少公一人哉人之云亡百身莫贖卒年七十八葬於孔字三圩之原夫人查氏祔四子二女孫男五孫女三曾孫男二曾孫女五其四子中一爲公子進士允培後工部晉垣公公子進士允培諷兆域有日矣數千里以狀示狀之懿美不勝書以余待罪九重積譽百姓之意錄公之功德久著於朝野者以遺之以樹石於墓之陽銘曰

赫赫皇祖薪標以烝用之不盡今皆股肱天祐皇國有憑有翼乃篤生公主璋駿特發寤齟齬書紳希聖清夢通神孝先百行法隨官絜情與俗商煦之嫗之刑之以當允文允武羽干樽俎化雨澤宮諸生半魯獸窮則攫耳耳爲良有嘉折首脅從不追淝水風驚淮西雪渡不賞功高莫容道大維彼其氏逸我桑園所未竟者以

貽後昆人沒道光天寵游至自西自東千秋萬禩

先祖少溪公暨祖母沈孺人墓誌銘

嗚呼自大父沒垂五十年而始得窀穸於茲土也暴淺久入土爲安又喜近與先君壘相望時時得辟咷曾孫往來靈氣於數十武之內大父其鑿臨哉大父諱汝恭別號少溪西溪公之長子西溪公之父曰怡閒公怡閒爲人篤實有姪某者剽悍窺室中藏乃以計給怡閒避里長發局悉其資懼事覺往逆怡閒置舍毒之酒輿歸而卒卒之頃謂子西溪公曰鴆之仇也義不共然方穉不能自言於官非彼敵徒自殺慎勿出諸口是時西溪年纔十五承烈禍之餘奉治命側身修行鬱結早世以故北三枝葵軒公之世業至少溪大父蕭然徒壁立矣大父丁家不造奉娶母沈力食侍養而沈教過嚴大父一稟弗敢怠好讀史尤稔陳壽所志人物傳手不

乾坤正氣集

卷四十八

三

輟曰節孝忠義在此編矣生三子長卽先君也每謂教家以擇術爲先諸子皆非宰百里材然國家卑農穡藜弗善也求其不失士農微意而可治生者莫如買賣五穀屬諸子並業焉性真慤與人不失尺寸常負朱姓金逾年朱病且亟大父聞信姑熟遄返詢朱牀下朱已擣舌不能言大父徐出金告之曰前欠一一奉楚乞收明朱忽蹶起誦言曰世上有如君忠信人哉願君世世生賢子孫遂絕家人詢知還欠或駭之大父曰吾故賤所以不先到家者恐爲汝輩所惑也大父與胞弟守溪公篤友于無爾我守溪善治生母沈有棄灰遺之大母室語曰姑出肥何偏我大父勃然瞋叱曰吾母也吾弟也唯命汝外人乃來及我毛裏間事大母悲咽不勝曰妾私君故耳語君君乃大言嗚我過使我不得爲人臥不食者累日後遂終身不敢有所私語大父表率之嚴也介生三歲大父

與先君同見背音容既邈凡遺風軼事都得之大母平生口語中  
大母與曾姑沈同貧困者二十餘年與母陸同孤寡者三十餘年  
母陸懿範出大母而曾姑又爲大母懿範所自出一花三葉人以  
方周太姜太任太姒之世德焉故雖若曾若祖若考三君子享年  
不克竟而宗黨向風歸化共推閨閣爲里祭酒則大母前後纘維  
之力也先是少溪公新立家窘幾不保徹廬曾姑彈淚謂曰祖基  
弗輕擲一擲便有落葉不得歸根之慘吾寧餓守先人尺寸土數  
米併日嘗手捫鍋蓋不使兒女輩滅竈更燃大母時舉以示子孫  
曰老身數十年後念此猶齒禁骨慄大母與母陸同臥起母泣則  
大母與俱泣饑則大母與俱餓母鍼指徹昏曉大母與俱徹昏曉  
嘗教母曰寡婦有三安一曰安命不安命者嗔天仇地父母公姑  
視同冤業一曰安貧不安貧者怨己責人手足頽惰乞貸無厭一

乾坤正氣集

卷四十六

四

曰安分不安分者燒香種福結伴出門招搖人目母陸謹守此三  
言以終其身母陸居長有兩孀季孀樸大母有所需取給焉仲孀  
慳無所索大母謂母曰吾非有所重輕也人慳而故索之應則褊  
性弗克繼不應是逆姑之請而使不順之名外聞上人無容德則  
下之短立見稍忍所需以彌婦闕則家和和致祥矣叔祖母蔣有  
賢能東西對戶嘗於夏月承肉涼露中介兒時望見輒作嗚嗚聲  
蔣母笑謂曰兒意得肉吾具曉但我肉減片不成盍兒得片肉未  
卽脂肌且或因此以長染指之習大母聽然起謝曰聖人之言也  
凡民失德起於豆觴教兒嬰孩識之哉無落此語其撫蔣母之子  
媳甥婿如已出延及三世至今未敢有所厚薄分也周人急無多  
寡不待其聲盡迫則解衣脫簪珥一歲中強半爲人所借質年八  
十有六鶴髮龍顏輕身不扶鳩膚理堅潔當風癯骨有清香萬歷

庚申仲冬無疾而逝生年乙未崇禎己卯合葬於骸字之四圩  
曾孫偁於東偏子男三長口府君九思次九成九富孫男三以介  
以和以中孫女二曾孫男十偁早世錫元錫台錫蕃郊瑞聖召錫  
命祁瑞君召錫祉會孫女六不肖孫男以介自爲墓誌併銘

古不擇地國都北併無年月日時淑去溼藏風囊事終吉凶拘忌  
多淹宿譬王父母在生前未必千金住華屋吉壤法眼俟僊緣靈  
宅麓安生者福

培翁叔暨藩沈孺人傳

湖下多鼎族族大物滋門高釁作其間服食華侈拳勇凌轅交遊  
匪雜聲歌博陸驚四筵高曾規矩浸以漸移比比而是吾族長者  
每咎宗祠久圯不舉族譜斷爛不修典型湮滅舊德不光無以昭  
後嗣介稟稟竊有志焉顧卑貧寡唱庶或採誌先賢又患流傳遺

乾坤正氣集

卷四百六

五

逸則惟是及身見知如吾上林苑署丞號培初公者公諱子恒字  
常甫靖江相一葵翁之叔子自清樂翁著姓再傳爲桂軒翁賑粟  
山東鴻義聲又再傳爲兩槐翁雄貲傾里黨約束鄉曲人爲辟易  
靖江則易之以醇謹當是時靖江值雄霸之餘澹然雖守家以文  
弱中落所分析皆磽瘠公審時變又易之以緊嚴慨然謂紹父風  
弧矢四方翱翔鴻鵠有伯仲在至或恢拓祖業白圭計然去人不  
遠且丈夫寧必盡咿唔弟子員然後能奮迹哉顧後所成就何如  
耳公輟帷蓋巡行阡陌治粟以爲經而元配孺人沈椎髻操作脫  
簪珥匱蓋之具稍用質劑法以參佐理傳曰以末相生以本守之  
本不在重蕃孕則饒息不在輕不耗乃續兩尊人皆身先拮据推  
誠僮僕率粗糲同甘苦公嘻以迎人不忍負孺人截以肅人不敢  
欺其爲教也捐纖麗而崇布粟棄風騷而敦樸拙輕速化而貴漸

積門無流雜家無妖冶嘗以蹈水養雞之術嗒喪悠徐而財阜已  
什伯於初矣家業成遂稟知足之戒京貴人親知折柬招山中公  
儵然一往長安謂蝸角中無可容我手板者聊一看花上林聽鶯  
禁籞耳及得先大傅絲綸報又謂灼地非麋鹿所依遂接浙歸開  
圃疏渠迴廊迴閣築舍與孺人禮大士別宇肖父葵翁像與孺人  
月朝十五上食誌不忘急流中之見道者與不特此也公與孺人  
有隱德口不言人亦莫能跡其服循之處而介從花月晴和中追  
隨懿範則嘗得其口澤之所存偶一日介請曰先生何以僅僕欣  
欣也公曰御下褻則偷剛則遁吾與之日有虔夕有考朝氣與相  
感而夜呼與相聞直可手指目視而以意相往來故能無縱逸之  
罰又一日請曰先生何以齊眉加敬也公曰中人無完材夫婦合  
爲全璧吾婦系世簪纓媿夫人無不身致翟珈彼獨能攻苦自展  
乾坤正氣集

卷四百六

六

於閨閣卽吾隨父翁歷任西南十五年間其守何畫一而勿失者  
誰力也又曰先生父子何道之能樂也公曰天倫之慘皆繇責善  
過深舉世間全德備福交相求於生我我生之間而卒不得報則  
相夷之至也且生兒苟得有蒙安襲慶讀書曉世務敦本不失身  
足矣曷又多求對面歡生情固然者又一日請曰先生兄弟何怡  
怡之能也公曰古之言兄弟者多大約鬪起於相猶而怨生於不  
讓猶與不讓乖莫大焉予知我之無居而有居乎知我之有居而  
不沒質居之金乎吾不廢仲兄之成命也含殮蒸嘗惟我之依吾  
不恃仲兄之成命也田疇什物推與瓜分應得者而莫我敢承夫  
世之幸亡而利其有與委死而不恤其無者皆無胸者也吾視弟  
與姪栩栩然猶吾之分身而不以岐也諸若此者則皆吾婦沈相  
與玉成之故介所耳公之訓又如此公賦性坦率質任自然無儀

飾好施予至其命棹山水較量文酒稗史傳奇丹書白業公亦時從游涉焉要非大節之所存不具贅家乘曰論人者必得人一生精神所獨注而其餘亦旋以舉焉公一生神注在治家而不知世所謂孝弟忠信者非必深論以及於道也性也總之皆治家之法也治家而御下不寬與縱僕爲尅其富必不久治家而毛裏不親琴瑟不調墳簾不協其富必不安安而且久勢也亦理也且世所謂富貴文章德行四者人各以所長相輕所短自祖宗視之皆肖子也使必盡如顏回原憲之徒則家人六四無吉之可稱矣如其道文與行皆其中之所包互也世族多貧正爲富者不繇其道或繇其道而富者以不繇道而終貧余故著論公與孺人以見修譜之大端云爾若其敷揚璇炎借垂竹帛則有大君子如椽之筆在

溫寶忠先生遺稿卷四

明溫 璜著

涇縣潘錫恩校

候長樂師

春間適以憂勞成疾不絕如帶極蒙注存無已每從敝友朱廣屢述師臺口誦手札真有呼吸關心疴癢切體至誼繼惠參餌如沃焦土萎枯立起譬救卵於纍棋之上餘年晷刻皆手造也又復不以近死之人遐遺其母寵以扁顏錫以粟帛種種恩私纏綿無替竊思介蒙師臺下車雨露在禽鳥之內得氣最先同諸生遍地陽春覺桃李之中情深獨至夫人一身事莫切於死生情莫親於母子德莫重於節孝行莫大於文章而師臺羅而致之一人方之知己古今寡二衛環之忱曷其有極

東少師兄

乾坤正氣集

卷四 吳元

一

月杪東阡抵里門詢慰吾兄萬福併及聖眷方來鴻猷蔚起斯千載快談已恭讀手教抽繹六難言言深切描盡救時之苦衷待且繼日之心事天下推之不去之苦甚於招之不來之苦人世杯影弓蛇之結甚於觸蠻鬪穴之結古相臣之案唯乾三四爻可以當之餘卦皆李世君臣事耳三四兩繇不出危疑二字而疑甚於危故四之躍淵更難於乾惕文言曰上不在天威福還之天子可也下不在田富貴付之臣庶可也唯是言人之所不敢行人之所不能忍人之所必吐容人之所不堪故曰中不在人是則疑之說耳傳曰淵者上空下洞深昧不測之所上空者爲其能通乎君而常疑其不肯通下洞者爲其能施及下而嘗疑其不肯及故曰深昧不測是則疑之說耳淵之一位迺相臣莫可退避之位疑之一擔迺相臣莫可脫卸之擔故周公係爻擬躍謂其躍而出之也從此

深昧不測中尋取一頭出路其庶幾乎吾兄所示自一難而外段段皆府疑之地幸得遭逢明聖盡忠竭瘁從六難幹補一分天下受一分之賜豈弟輩所窺測其萬一哉

### 答嚴廬州

山澤疎容瓊瑤敦念弟日暎薄而兄益加注存謝謝詢兄福祉政績期年臻化吾輩胸臆不自展開政賴知交演派朋友分身譬之春社客酣主醒便快惟是邇來郡邑獨催征難處但當實心休養觸手劑調不願揀好題目創弄精采昂頭濡尾也卽如同比未完也悍然不願與對之戚然興嗟者望其容而仁暴分矣以爲急公不得已而爲之與惴惴焉惟恐參罰而起見身家者道俗又分矣君子當無可誰何時直能肺腑相示耳此則所可自爲者也且夫對簿書不難見材而難養氣一日之內一句之間須辦一粒閒種乾坤正氣集

卷四 頁五

二

子以時招納清虛浣滌慕憊敏有敏適拙有拙趣如貴治繡溪墨池可供嘯歌芝山梅洞可佐參餌靜則訪洗耳之高蹤動則尋淝水之遺算此又居官者所當作一功課循而行之者也昨冬榮駕時弟適持卮酒祖道居人指點官舟已發不踰三刻弟冒雨督追遙望如睹而僊艫奔迸犀破石尤小航逆折風波藉面英雄回首便作雲泥之感聊附此與兄發一笑耳

### 柬友

病後日尋快活種子無如信命一著中庸漫天說地擘頭一箇命字開場曾論千言萬語到底一箇命字結煞信得命及八風七情都付與命公收管將自家身子做箇金蟬脫殼之計譬如財主百萬錢刀出入盈縮盡數拋與大綱紀掌理方得主翁自繇自在喫快活飯便睡一覺豁然無有拘束此我近日得手工夫非謊說也



荅友

兄之賞譽弟也非弟之真也取其似也然弟正願兄舉似而已若求吾真則癡垢百出矣如貌山水正在彷彿不然恐川巖豈免頑石汗瀟之病哉少君之攝李夫人也領其似也延壽之畫毛嬙也貢其真也使當時有善嬙者圖其貌而隱其疵則明君豈非昭陽殿第一人哉故索真則傾國難邀禁庭之一顧舉似則魍魎亦足動天子之感思真之不勝似也審矣何也似我者容我也弟之願兄者此也

荅友

秀才如積薪弟依庠爲窟作老蠹十七年後來髦士居我上者何可指數鮮葩燦發日異月新後生不棄便譽我爲松柏不過謂能熬仗風霜經堪歲月一硬頭皮之別號耳若以此定爲廟廊法物乾坤正氣集

卷四百九

三

未必然也春桃秋菊時至競賞豈在年德哉足下英年早第驚相畏羨乃復推獎過當將無唐高欺李魏公耶主臣主臣損惠同門稿併謝

荅友

來書自朔得看乃在旬末慰誨忠愛浹至不啻參珠璣而督鍼砭矣閒步朗吟白雲停止適中聖同時卻寄一律嘔出心肝不當錢一生長恨在尊前赤貧孤子殊何意閒館西賓莫浪傳世事茫茫愁未了淨名漸漸想徒然此身真有千鈞重無使纖毫病久纏更迭怡詠覺我三人形神融合無復著病處也我病根抵麩蘖傷中溼土觸以思勞而發思勞標也百方草汁搖手謝力主茵陳白朮三十劑愈來教正與相符大約中年衰象雖眇有餘終不喜導利耳又教以暫緩文字業此古德碎卻筆硯第一義但人情必有所

寄如古人逃禪沈飲囊血長吟穿被學書皆以獵喜陶頤祗不當  
對蒲團思作佛舉觴詠繫千爍攤卷牘而游神肘後纍若耳何如  
何如茹淡安緣是弟枕中鴻寶總知命可以盡之聖人五十知天  
命非聖實能凡亦宜爾猶之七十非肉不飽五十非帛不煖應候  
行令直迫理勢非可學力至不至論也不至者自蹈苦海耳遽公  
行年五十而知四十九年之非何者是非不到知命雖讀書萬卷  
行能天壤非耳是故莫淡於命莫安於命矣且弟密邇少師往還  
京信自其發奸蒙謗得口君代言無不處地設身真見朝廷遇合  
閣部勳名邊海動定雨暘愆若底是爾爾底是爾爾便與我丙丁  
一第除卻鷹犬於國馬牛於家兩不爲以外此際更難措手康節  
偏霸手段不如安樂窩較穩也足下羽儀出世醇醪醉人吾日敬  
之羨之萬乞勤示格言最我爲禱學老彌篤大德不踰勉之勉之  
乾坤正氣集 卷四頁十九

四

京信

讓口慰貼浙疏遣征真如雨霽天清矣今後無問去畱定有一疏  
撒手或云發奸之傾聖聽者專在結黨欺君四字若關節特全牛  
一體耳擒拿不如暎帶此一說也然終疑于隘或云皇上加意江  
陵卹典飭弛振廢之意了然再得暢論朝廷大利病幾段以酬知  
遇不屑屑于一人一事爲工耑執不如廣大此又一說也然亦未  
免作意弟嘗試爲兄更作竿頭之想今無論難兄祈兄總在大拜  
一著耳不知男子忠肝義膽都是伐骨見髓去處忽到前後際斷  
決不從功名富貴尋討出路還要忙地抽閒愁田種樂將精神意  
趣口猶蕭灑養個湯文樂天氣象一旦白麻寵錫泯意揮揚不然  
青山白雲無恙安能以彼之所忌爲我之所冀哉且天欲平治天  
下舍我其誰冀與忌皆勞擾也如此淡話吾兄以爲然否

寄友

入春見華林人時時訪絳幃動定卽歲不一二見見亦不信宿胸中浩浩焉放懷而釋諸慮者如明珠入手雖不敢時啟褻觀夜光樂其思睹得睹也一江渺隔烏能引天涯比鄰以自申譬弟年來惟先慈兆域一事臥未帖席了此便可作右軍誓墓文矣顛毛未斑年已五十如介左右同庚輩有蟬生而蚤厭世者有鴻冥而謝子衿者有鵬騫而食肉富貴數十年致政山林亦有攫鱗獲譴遭磨蝎而悲雉羅者般般種種於儒則廿一史興亡得失之事林於禪則三千大千天堂地獄之現相弟於其中有幸有不幸焉幸更有幸於此者不幸更有不幸於此者將惘惘以奚之昨論五十知命之旨云天命孔子以不君不相孔子知之矣天命孔子以木鐸萬世孔子亦正於此時自知之矣今弟所知者一第之莫必耳或乾坤正氣集

卷四百九

五

天之所以命我者自有在弟猶未知所以自處也先生何以教我

溫寶忠先生遺稿卷五

明溫 黃著

涇縣潘錫恩校

易學總論

經與子異者書之遠者斷自陶唐而唐猶虞書最遠者易斷自伏羲而羲本無言卽禮樂止及韶舞然則有虞氏之前其文不可得而傳也無懷葛天神農黃帝之書聖人所不敢道也

聖人窮理盡性而說理斷自乾坤說性斷自天命性理之旨要歸於夫子太極太極亦只是就河洛中數提指出來本非向上一層理會自此而往不可更詰從太極而無極有無者有無無者有未始有夫未始有無也者吾儒非不能言不欲言也聖人若曰物出乎震足矣人生於寅足矣果有仁泉有竅足矣天北極山崑崙水星宿足矣學肇於致知數起於中一喜怒哀樂本於未發足矣

乾坤正氣集

卷四百七十

一

義卦圖

乾一兌二離三震四巽五坎六艮七坤八此先天序也自一至八爲三十六而八卦方位奇偶之數亦三十六卦序一八二七三六四五互配爲九而乾坤三三配爲一八坎離三三配爲三六巽震三三配爲四五艮兌三三配爲二七亦皆九數也卦畫奇偶之數亦奇矣哉

圖用十卦用九河之十牽連洛之十對連卦序之九以應配卦位之九以對配

乾坤

乾坤是蓋天蓋地徹始徹終理會著一字卑隘不得

元亨利貞是卦例文言獨析爲四只是夫子河洛熟爛隨手看見

五數四得四時頭頭是道

六子卦位多亨利而少貞至元絕無蓋乾主元而坤主貞六子不敢並其詞

乾坤爻例亦與諸卦不同乾卦爻爻都從剛健中正純粹精處出來坤卦爻爻都從厚載無疆出來豈可擅入衰世君臣氣象乾是天道則六爻並應君位蓋夫子文言自明註之矣一則曰見龍在田君德也二既君德三四爻可知卽係以相亦須負君德而居相位者乃可當之元德升聞君而見者也負展放桐君而惕者也虞夏攝老君而躍者也他人之相相而相者也舜禹伊周君而相者也是之謂君位

坤卦六爻夫子亦有明註釋二曰地道光也釋三曰地道也便知餘爻倣此初得坤道之始履端能究所謂知微知彰之君子也上處坤道之終陰極而不受陰之錮所謂天心見而羣濁退之君子

乾坤正氣集

卷四百七

二

也若予初以弑君弑父而予上以抗陽逆天大非首乾坤之旨乾坤六爻各自一德故絕無諸卦乘承比應之例詞

彖例德體象變乾坤亦無此詞

伏義止有畫至爻知有卦名只這六十四卦名便已奇絕六十四卦彖例大半屬好一邊爻例大半凶悔吝居多

同氣相求

以一身求天地之理玉髓也金筋也石骨也水血脈也草木毛髮也土肉也山頭也腑腹也髓爲一身之元氣所以爲至貴也山氣多男澤氣多女水氣多暗風氣多聾木氣多僵石氣多力險阻氣多瘦暑氣多殘雲氣多壽谷氣多脾土氣多疴衍氣多仁陵氣多

貪

石韞玉則氣如白虹石生丹砂則氣如紅霞

師曠云歲欲豐豐草先生齊歲欲苦苦草先生葦蕪歲欲惡惡草

先生水藻歲欲早早草先生蕨藜歲欲雨雨草先生藕歲欲病病

草先生艾歲欲流流草先生蓬

禹貢曰攻山取銅鐵鑿池數百丈銷耗陰精不能含氣出雲則多  
水旱之災

山川之氣積爲列星精耗神竭於是隕星

星隕精氣竭也川竭水脈絕也山崩地脈絕也當其所主之地則  
爲災海水不潮亦水脈絕也

海潮天地之喘息也天有晝夜潮有潮汐隨月進退從其類也  
世間特一陽氣周流耳陽氣不及之氣卽爲陰

氣盈於三百六十五朔虛於三百五十四合氣盈朔虛而閏生焉  
形之所以生也必資於精氣血精之榮以鬚氣之榮以眉血之榮

乾坤正氣集

卷四百七十一

三

以髮形之所以立也必資於筋骨肉耳骨之餘也齒筋之餘也爪  
肉之餘也

問精何獨與於鬚曰闍寺與婦女其證也

陰脅陽而爲雹沴氣也陰凝而未勝陽則爲霰正氣也故春秋書  
雹而不書霰

風雨雲霧雷天之用也吹咽噓呵呼人之用也

風陽也故其氣清通而無形雲陰也故其氣昏濁而可見

日月星辰天之四象水火土石地之四象康節言土石而不言木  
金木乃土之華金乃石之精也

列宿所以定經天之體七曜所以布四時之政

天陽宗故日最盛地陰宗故水最盛

南海中秋有月則蚌胎珠

晝長多熱晝短多寒本乎日也月滿潮盛月虧潮衰本乎月也  
天裂而火光見陽極也地裂而泉水溢陰極也

列星之爲象也在朝象官在人象事在野象物各因其變而占焉

同聲相應

有形無聲木石也有聲無形雷霆也有形有聲人物也無形無聲  
鬼神也

樂聲淡則聽心平樂聲善則歌者慕銅鐘西應蕤賓躍鐵入破笛  
裂

乾道變化

月令雀入大水爲蛤是羽蟲化爲甲蟲也鼠化爲鴛是毛蟲化爲  
羽蟲也腐草化爲螢是無明化爲有明也松樹化爲老人無情化  
爲有情也婦人望夫化爲石有情化爲無情也

乾坤正氣集

卷四百七

四

各正性命

蜂君臣虎父子雉鳩有別豺獺報本

世間萬物無不生蟲南方有火鼠陰山有雪蛆

雉善視狼善聽狐善疑駱駝善知泉象善知地虛實

澣布以灰濯錦以魚洗金以鹽

巧音者拙羽豐實者齋花香多者色滅

胎生者眼胞自上而瞑卵生者眼胞自下而瞑濕生者眼無胞也

不瞑亦不寐化生者眼無竅惟有黑點耳蛤蚌則無目曰離爲目

廣八卦俱備狽以狼爲足螫以蝦爲目

龍之異在骨故吸氣犀在角故孕星蚌在珠故胎月麝以臍通關

鹿以角補食獾肝月生葉而祛蔡龜知來猩知往鯨之皮鞞麟角

鳳翥之膠續斷以至象以牙翠以羽魚以鮫各得五行之秀

雁順陰陽而南北魚順陰陽而上下鶯燕蛇蛙順陰陽而出入  
問膚毛何獨長於髮曰凡物皆精血上行故馬蕃於鬣鹿崇於角  
鶴殊於頂

人身一泰卦上六竅外卦下三竅內卦居中者名人中曰男子九  
竅婦人兩乳而十一竅男泰卦婦謙卦

竅於上者清虛爲神氣之戶下竅陰濁故精血糟粕繇焉上竅主  
納下竅主輸

問髮與鬚何故獨長曰凡人身精氣出入如水膏泉液之處草木  
滋榮故孔竅皆有毛生而獨氣之衝於頂發於口者爲最大如草  
木之叢茂於山海也

禽獸皆有足而無手曰無怪乎猩猩之自貴而舐其掌也人之不  
能自經緯其手者與無手何異

乾坤正氣集

卷四百七十

五

人之異於禽獸者耳目鼻皆同而缺舌獠牙與角去齒口具而不  
能言人之所貴者在此矣六音生而六書肇文字備而謨典陳譯  
九口號四海揚王庭詔來學厥功懋焉曰八卦之中艮有輔兌爲  
口巽申命坎習教離文震雷而頤復有專卦聖人良有深意哉

乾曰三連坤申六斷震三仰孟艮反覆碗兌八上缺巽下斷離  
凶中虛坎穴中滿

問人順生禽獸橫生草木倒生何與曰天地之氣直行人得之以  
生日月東西行禽獸得之以生雲雨泉澤上行草木得之以生只  
這一理橫來直撞顛之倒之莫非箇中元機故義文圖卦有順有  
橫有倒

禽獸後竅皆有尾以自掩其醜人之禮義廉恥亦男女之尾也凡  
卦初爻是尾位故家人之初日閑有家



馬之剛者以膝伎人人之卑者以膝媚人馬得乾坤之正氣人不能得禽獸之剛氣也

問佛怖死故著無生老貪生故示不死曰此語大逼當云佛見世人怖死故著無生老見世人貪生故示不死總不若乾道之大各正性命何必無生保合太和便可不死

疾雷動物不貪而迹於嘖春花如笑不嘖而鄰於癡洪海容流不癡而疑於貪造化猶然况於人乎凡卦初爻屬貪位中爻屬嘖位上爻屬癡位乾初惟不貪故能潛三惟不嘖故能惕上惟不癡故得進退存亡之正

問龍在乾而復係震何也曰乾龍德也震龍宅也乾之六龍皆發於震重陰之下

問坤利牝馬而廣八卦復列多馬於乾何也曰坤特其牝馬一事

乾坤正氣集

卷四百七十

六

耳馬實龍種取類滋繁故乾卦所廣幾與魯駟並雄

問聖人不及鹽筴豈煮海聖人所不道與曰聖人隱言之於兌矣其於地也爲剛鹵蓋鹽法欲謹聖人僅舉義於兌之東南而馬政欲繁聖人詳稱名於乾之西北

總看乾坤六爻妙在用字凡卦例承乘比應非人用我卽我用人德薄資輔之象也惟乾坤六爻能自用其德如耳目之專司非唇齒之相倚乾爻各自用其九坤爻各自用其六能用而後能變如上爻能自用其亢故不借媾於惕上惟能自用其亢故可環反爲潛

看文言六爻總見乾德歸本一誠初曰確乎其不可拔二則謹信以存誠三則忠信以立誠太陽一點萬化開基自天以下氤氳團結日月星辰以光滿雲霞雨露以蒸滿四時以溫涼寒燠滿近香

澤者臭滿近響答者籟滿近山嵐滿近水煙滿天涯思滿異類性滿同類情滿四海文譯滿千古詩書滿同生無妄隙鍼不漏飛鳥憑虛如人履地能實其所虛者虛亦是實能虛其所實者實亦是虛是爲親上親下之本

問誠與至何別今夫目能見日是目之光至乎日之域也聲聞百里耳之韻至乎百里之境也梯山航海力至乎山海之涯也暑而暘寒而慄氣至乎窮陰大炎之野也擬之議之精至也不思不議神至也其所至之處皆實理也賢人企乎其所至故曰民鮮能久矣聖人至乎其所至故曰知至至之至乎其所不至者是則亢也而流於悔矣

看彖傳緊關一時字乃六十四卦之訣易之爲書德位時盡之矣德者時之乘位者時之御

乾坤正氣集

卷四百十

七

問坤初明是防陰之禍曰防禍亦可但不當指初爲禍端指初爲防禍之人始得

大抵陰之妬陽正在純乾之日後王之弊未有不兆於創業之初者也故以漢高全盛之時履呂后之霜則知外戚之冰至不惟是前人作善亦有病漢嗣王各諡以孝以孝名則太后尊太后尊則戚族驕故履孝諡之霜則外戚之冰亦至

以初爲始陰則將以初爲弑君與父者矣初居坤道全盛之始當爲辨弑之君父

看彖傳坤德爲順而順德之妙有二一日厚如含宏含萬物含章括囊在中是也一日貞如剛方無彊大終是也

舉世好利故聖人係卦利詞獨多蓋導以攸往之趨而非以盈壑乾始能以美利利天下隨掃之日不言所利此其可筦利權者矣

獨於坤彖傳文言並作省文而不釋利益坤量寬厚故可主利而陰性缺刻不可以導其流未幾長女一索坤量未宏而陰機一入不出遂有爲近利市三倍之謂曰近日市曰倍陋之也聖人之尊坤愛坤深矣

元與黑何別元非黑也合五色而深深不測謂之元天一生水故北方得天之氣而爲黑黑者元之餘也人本乎天故膚毛皆黑草木本乎地故土毛皆綠五色無綠綠者黃之餘也藍者青之餘也故草木初舒之色嫩黃萎落之色深黃詩曰綠衣黃裏人之鬚髮青黃赤黑白皆具他毛不然

五味五聲舌得其兩故舌之用最大禽蟲之口一也而舌殊惟鸚鵡舌似人故能言綿蠻百舌故可變聲餘但長鳴長嘯而已又其餘則假物以舌蟬以翼爲舌笛以蘆衣爲舌笙以簧爲舌蛙以股爲舌谷以風爲舌水以石爲舌鐘鼓以桴杵爲舌巧莫巧於舌故舌之苗在心心愚則舌喬而不下

屯

大槩彖例總是論時論理之詞或是時適如此或是時應如此或是理本如此或是理當如此但著一邊卽同爻例

卦例須統看一卦頭腦何在當細看關竅何在當屯之時定思得人而理彖之侯爻之虞與婚媾主輔交成此頭腦也看彖詞屯之關竅在動貞者所以善動之器也經綸者所以暢動之材也看爻詞屯之關竅在幾盤桓幾之候也匪寇婚媾幾之似也小貞大貞幾之分數也知幾者明失幾者泣

爻例聖人無絕詞或警未陰或回覆轍悲憫之中煞有深省卽如上爻泣血漣如憂懼而已聖人正使知其所憂所懼者何在以自

求濟屯之路更不得挨延頃刻故曰何可長

彖詞元亨是一段兩利作兩段勿用與貞一氣讀

凡卦名例所包甚廣氣氤氳未暢曰屯物勾萌未舒曰屯世洪濛未判曰屯心幾希未達曰屯

到泰時方名天地屯時僅可稱剛柔

只重一動字險中能動故大亨動而在險故利貞

不寧二字正描候心事在上卽爲動在下卽經綸落建侯後一層便添足

卦例無復詞彖言利建侯但論理耳周公若曰如此盤桓居貞之初倘彖所謂利建侯者此其人乎

乃字逆料之也幾幸之也堅決之也

垂剛迫於勢也而二不字之志已可想矣反常明其分也而二經

乾坤正氣集

卷四十七

九

綸之業在其中矣作文須得題外景

卽字入字描盡熱中不顧飛蛾赴火之景

孟子不言易說

孟子不言易何也當時楊墨莊列之徒已浸浸譚元說妙啟兩漢黃老之端釀六朝虛無之漸若復說易是以空滅空也詩書春秋以實擊虛之教也

讀書習氣說

一友自謂讀書有得每拈一則若身履其會者余曰此習也何足云得哉凡人讀書史如王維輞水疎鐘寒犬之聲子瞻歲盡風雨燈窗之趣白晝覽之如坐中宵及平夜月窺庭簷燈照影漠乎無可咀嚙也又如俗士愛錢華子捉金之鋤態文人無行相如挑婦之琴心獨坐參之如犯公議及乎寸璣小壁粗面殘粧勃乎未可

禁持也此豈得謂讀書無益哉習心錮而偶然者不足以奪之也  
士民說

今天下士習民風下吳上止蠱象也其機皆起於惰而其勢必至於貧弊蓋繇於耕讀之路不明互相趨而交相病也士誠漫漶夫詩書則田野之粗闕拜揖者皆可登降儒林矣民誠荒蕪其穰租則腐臭之妄意倉廩者何異石田冀獲矣民間二十畝之產不得一襴袍則里役立碎故農盡化而爲士青衿之子無十鍾之租則必高堂泣月穉子號風士亦盡化而爲農所以家家登孔孟之壇不能救一饑渴人人履禹禩之圃不能圖一飽溫迨嗚張鬼逐之形現然後厖廟堂之清暇而內顧潢池則何不取該地方一二皇華之使加之意哉

恩仇說

乾坤正氣集

卷四百七十

十

恩仇二字宜有辨居高臨深勤施罔報曰恩若兩賢莫逆謂之知己不名爲恩也情誼乖君父是非枉古今曰仇罵坐吹堯是魔蝎耳豈仇之謂哉是故君子不以升斗責報不以一言按劍也

養火說

人不可以無火火可養不可消不可降消則絕其生之源降則開其洩之路陰符經曰火生於木禍發必剋語曰一身都是火不運且燒身然則運者養火之妙術也不運則搏搏則聚聚則發運則沁沁爲土運則肅肅爲金運則潤潤爲水運則疏疏爲木通暢和平有火之神無火之迹是故梔柏苓蓮非治火之物也術家謂心火下交腎水上制此對房勞不節者發藥耳亦治火之末也善養者善火善運者善養運之維何養吾之喜神而已矣喜屬春春屬活潑潑地廓然泰然鬱者散而滯者舒則氣調而神適無搏擊團

聚之患木藏乎火而不必有火名火麗於木而不必有火象母呼子吸息息存存是曰養火然則喜者運火之妙術也

### 治生說

讀貨殖傳總核其術不出微貴微賤二語迺范蠡居陶曰治生之道能擇人而任時則是天地人兼爲用也白圭亦曰吾治生產猶伊尹之謀孫吳用兵商鞅用法是仁智勇兼濟之也豈不亦難哉而太史公傳陶朱居積僅十九年中三致千金則是一歲不及致二百金息安所貴計然之策公蓋重視此千金以爲如是是亦足也其傳數封言庶民商賈歲萬息二千百萬之家息二十萬正亦尋常什二之利了無奇勝公又若重視此二息以爲如是是亦足也故曰以未致財以本守之以武一切以文待之變化有槩故足術也繇此觀之什二之利豈易言哉而三之四之何也

乾坤正氣集

卷四百七

十一

### 西粵山人說

西粵山人亦不知其從來教我以長生五字訣積陰功第一卻病第二余疑陰功非貧士所辦自云愧無虞卿魯仲之骨麥舟分宅之資山人笑曰此齷齪辭章語萬事皆繇心造卻病陰功原無二義余益茫然者久之山人曰原人百病不離食色兩端假如男女之構害也無如寡色慾以養元精木從水旺而真火胎果知色慾之當寡則牀第有餘情而淫心必不及於東家矣假如口腹之滋疾也無如節飲食以培中氣金從土潤而真水出既知飲食之當節則藜藿有餘甘而傷生必不濫於郇厨矣余頓首曰此論從無合發便是參同口訣也

溫寶忠先生遺稿卷六

明溫 璜著

涇縣潘錫恩校

讀書凡例

今天下皆集其心思智力畢力於文章而不顧其題之安朝廷賤表策則史學空矣科舉左經義則經學細矣試官無端莊通達之題則講壇絕矣三十年來漸靡風氣居則枵腹匡坐出則徒手奮呼文可無題題可無書卽世所謂講正講枵腹徒手之書華顛盛氣歲獵一遍韋編幾絕白首茫然曷爲而題可無書先儒命題皆全章通節卽片言單句亦係通章領要講書作文原非二項近來棘闈顧忌懷挾都尙破碎攔截之題士子作文臨時應付無非斷章取義之法絕少回龍顧祖之方一味填砌掩卷思之竟不知作何題面所以今日士子止有相題命意足矣夫相題命意務枝絕乾坤正氣集

卷四頁七

一

根之學也余謂惟講書可以救之書有凡例凡例者一徹盡徹之書也江河沼沚凡例皆水面背正側凡例皆山朝廷有刑書政典所不具悉者則以比例通之貨聚於市理備於凡故曰凡例也有凡例而後可以融章旨析題情題情者一日之計也章旨者一歲之計也凡例者終身變化其益無方者也題情開文竅章旨開書竅凡例開心竅者也題情可以類發章旨可以意領凡例非識力博洽莫或擬議也夫不通天地古今經書子史之大凡而謂相題可以命意此士學之日卑也

凡例者統經書之要通類辨物考同參異或發端於此究竟於彼或隱義於彼數明於此名目不同意旨無別若非引伸參伍終是守筌逐塊之見如學言中庸言性孔言仁孟言義書言中易言太極月光水影是一是二此經書之凡例也

又或一書自有一書之風氣有一書之主腦有一書之首尾若不  
通體全觀定致矛盾錯起卽就大學新民論之言民則國與天下  
盡之矣看到齊家則父子兄弟夫婦亦民也到絜矩則上下左右  
前後皆民也到舊邦節則下土之民卽上帝之民也微矣到淇澳  
節則當世之民卽沒世之民也更深遠矣學者將新民只如百姓  
字樣讀過一篇十章有何聯貫此一部之凡例也

凡例者有理學之凡例如陰陽五行心性道德仁義類是今只舉  
性字論之中庸天命道教觀聞隱微中和位育須從一字中圓滿  
迸現凡一字中納不得須彌山者眼光定不如筭箕大至如易曰  
成之孔曰相近孟言性善或以湍水或以杞柳或以犬牛只在性  
字源頭融透一片譬如高山萬象觸目可親豈有今日講天命之  
性另日又講杞柳湍水之性乎故相提而不疑者此提燈珠火者  
乾坤正氣集

卷四十七

二

也隨觸而後思者此浴門乞鉢者也

有經濟之凡例如帝王師相兵食政刑禮樂工虞類是卽以田賦  
一事論之須明曉夏何以貢商何以助周何以徹後何以履畝阡  
陌其物力之盈絀國度之儉侈利孔之開塞上下數千年鑿鑿可  
以計算經緯然後大學之生財上論之節用孟子衣帛食肉省刑  
薄歛種種囿圖語都有實際也

有典故之凡例如郊廟巡狩明堂井田河洛圖數人物世系類是  
卽就中庸郊禘一節論之園工方澤七廟九舞稷上祀魯配帝不  
從此查究詳諦一番達孝治國何處關會偶見坊刻明乎郊社二  
句云居歆配命取諸寒冰播種之功又云元正綱緼政在禮祓履  
拊之際只將詩史所載姜嫄與帝嚳禋祀上帝而生稷一事遂作  
郊禘合傳天人之際自合幽明之理自通事有確證意復淵切又



如品評人物須詳覈其事行案苟不明斷從何出如戊子季文子一節程不曰豫備而過求則曰周旋而無失如此說三思方有據胸無實學漫說空靈誠大病也

有機鋒之凡例如影喻咏歎問答呼應辨難引誘類是卽就問答論之如問仁問政何也如之何等語極虛極冒莫可撈提要思一人一問定有當下機緣懷來念想師弟君臣眼面相覷鍼鍼相對如顏淵通體透露故教以視聽言動仲弓只做得非禮勿動一句故教以出門使民司馬只做得非禮勿言一句故教以其言也訥是也如梁王救荒節何也意在罪歲魯閔節如之何意在尤民築薛節如之何意在遷竭力章如之何意在遷守兩難方與下面語氣神情字字緊湊不然公孫丑以不動心作案竟以贊孔子作結此不可解也陳相以並耕作案竟以市價作結更不可解也

乾坤正氣集

卷四十七

三

看鑑凡例

經與史異者經詞旨微約而史義類該博也史與鑑異者史記事首尾本末篇法了然鑑編年一君而經數事一事而更數人一人而歷幾朝錯綜散見此非有識悟之資兼收耳目之用者不能也顧世受耳目之病者有四談經濟者喜於刻覈獵文采者失於朝華典核者患塊屑而不靈憑弔者恐悲感而無實何也爲其見小不見大也試舉其大一日大統有一朝必有一朝之統凡宇宙之風會子孫之氣運出焉如夏忠商質周文漢刑名晉黃老唐風華宋理學各有根苗各有美蠹不可不察也一日大局一君立自有一君主意如項之暴劉之仁漢文恭嘿漢武拓大以至後世淫瀆遊佃莫不有確乎不拔之意而朝野桴鼓應之不可不察也一日大機成敗介於毫芒彼此分於呼吸或爭地之奴主或繫人之存

亡或決一日之遲早或判半語之從違此皆天地鬼神從中旋轉  
卽就我祖論之逃僧而問咎倡義一機也歸濠而子興踵滅一機  
也據金陵一機也先九江而後姑蘇一機也山東破竹已屬下截  
不可不察也一日大政如漢高約法三章陸賈詩書叔孫綿葛或  
洗百年之積穢或創補天之時宜或生民一日不可無或嗣王累  
葉不能變者乃稱焉不可不察也此四者當統一代興衰之故而  
總會之非可以一事一節求者若於一事之中有先著焉如國奢  
示儉國儉示禮七日而誅少正立談而逐四貴如蘇之從始於趙  
秦之衝樞於韓魏類是有要著焉如鄧侯圖籍充國屯田宰相不  
答錢穀繡斧不問狐狸類是有急著焉倉卒之中紛擾之際紀信  
可借則借之錯可斬則斬之美女釋囚不爲詐狗盜脫關不爲陋  
增竈可以當兵量沙可以代食類是有妙著焉耳目不驚塵埃不  
韋坤正氣集 卷四百七十一

四

動聊城一紙杯酒兵權如黨人則曰平原自無如新法則曰願者  
與之如七國則曰分王子弟如宦官則曰勿赦勿補類是然後觀  
其創論賞其奇人摘其快事焉蓋有四大以原其本始又有四著  
以撮其緊關尙何慮刻薄酸腐稗官野說之弊哉願其微言隱義  
史多闕略而不傳讀者深思弗能曉蓋有心與事違理與境反情  
與法岐勢與數背種種疑城莫尋阿堵譬如堯舜禪受也舜禹何  
必終相位周公流言也姜召何以不解救風雷何與於叔父孺子  
何與於桐宮管子誠可相矣然分奉子糾似多一轉謝元誠善將  
矣然泚水妙算至今未審衛太子直須一縛方定羣疑以爲經術  
者迂也奉世甘陳先駁一罪方可論功存矯制之惑者淺也范曄  
入秦全在三箇唯而不語秦檜見帝妙在三次退而請思人僅知

五丈原大舉伐魏要想其心正是守局人亦知澶淵奉帝伐口究

其定計不過和字凡此經傳或前後錯出或隱見一斑或如公案勘參或如虎鈴難解若夫某將某法某相某事如印板棋譜可領而不可用可以當機一用而不可株蹄以守昔人有言陳平六出奇計平之奇正不在六計內曹瞞七十二塚瞞之奸決不在七十二塚中此可以得看鑑之法經史鑑有異哉

### 讀易凡例

古今之理滙於經六經之義包於易易統於極竅於畫畫者竅也天下之變竅於此非往以竅天下之變也是故讀易之法當原易之所竅先河洛圖次先後天圖次著龜次六十四卦圖也而辭不存焉故讀易者必於無字句處理會夫無字句處不獨易也天下之理正須理所統會之地閒評閒論旁尋旁討故一觸而百通之譬如問耳目當先究世間竅何以能聲虛何以受明而坎離類是乾坤正氣集

卷四百七十一

五

問天地當先究世間方向何以靜處圖何以動活而陰陽類是問性命當先曉天不能生人水不能生魚肌不能生蝨而太極類是此讀書之大凡也故易用河而不用洛世之易用後天而不用先天兩者皆謬河序生洛序剋無剋不生當以洛爲主而河摩之先天體靜後天體動無靜不動當以先天爲主而後天盪之兩者合而易始生焉文之震離兌坎從河位也不知四隅四正又彷彿洛位也文之震正伏之離人知木能生火不知火蘊爲木體也文之離正伏之乾人知南方向明不知日月得天能久照也文之兌正伏之坎文之坎正伏之坤人知金生水土剋水不知津液之凝結處卽是金髮膚之滋膏處卽是水四隅可以類推矣河右旋洛左旋河重重環衛如帝居而采甸藩宣裏繞之洛分一二三四填補四隅勾連密匝而井田兵法兆焉約其旨不過五行之生剋而已矣顧

圖書在天地未生以前則五行亦居天地未剖之始世所謂金剋如銳解火剋如爐鎔皆有形不可以相譬我所謂剋制也伏也錯也逆也從太極中自調自和故金剋木木亦可胎金水剋火火亦可胎水且世所謂火者燄也所謂水者波也試取一物摩之則熱熱處真火噓之則潤潤處真水金木土亦復如是且夫土者虛靈之物非塊也虛則居中靈則寄旺於四正連絡於四隅併無所謂中故中者理之所自出數之所自起數者自一至十之數也河洛起於中五起於中一一也者奇也靈也洛有九而無十此去十而爲奇零也河五十有五北餘五而爲奇零也蓍四十有九此去一而爲奇零也然易皆取生數而不取成數故蓍之分掛揲歸止用一二三四五也繇此觀之約其旨理不過木火土金水數不過一二三四五盡之矣且天地有兩是天地從二生時有四時從

四生蓍與三才四時皆從數生皆從太極生龜亦如是卦之陰陽卦之奇偶也數旣妙於奇何復有偶蓋理必合偶而後爲奇奇與偶原非對待天地男女只當得一箇圖圖事武王三千人當一偶三千人惟一心當一奇耳目手足兩無兩用文之排比是偶兩比一氣則奇矣卦始於一加於三極於六六者兼三爲兩正可得兼兩爲一之妙攝六十四卦於一乾攝三百八十四爻於一奇是可遷之河洛之中矣然則文設卦而後彖生周設卦而後爻生孔設卦而後彖象生豈有詞外贅詞者哉一卦之中先口卦名次內外本之之變次剛柔中正之德次承乘比應之位只從無字句處閒評閒論旁尋旁討此看卦之大凡也且夫彖象君相也爻象則部曹也彖象心志也爻象則官骸也彖頭當一位焉彖傳當一位焉大象當一位焉六爻六位焉六象六位焉事則有十五事人則有

十五人人皆洗心退藏中人故卦無絕人事皆變通趨時中事故  
卦無死事然則吉凶悔吝利咎之詞皆活法也善讀易者於詞無  
與也

數至五而止矣六只是五之一七只是五之二八是五之三九  
十做此且一爲太極二爲陰陽三連爲乾四虛爲離取五之下  
畫爲震六之中滿爲坎七之上缺爲兌八之中斷爲坤九背如  
覆爲艮十之下斷爲巽數中自具八卦此亦天然之妙也

原道偶錄

天地非能父母直與人物同生性靈偶借形骸喜與造物爲伍  
理先世運獨持者羲皇都屬下流理隨世運俱新者陸萬已成陳腐  
兩間空隙之處皆氣填塞毛孔呼吸之竅與氣流通人在氣中臥  
起不識空是宅廬

乾坤正氣集

卷四百七十一

七

精神在氣不在膚肉五穀供氣不供糟粕

人生多被飲食所窘星辰不飲不食故降籍神僊禽獸善食媚其  
養已者遂入繚圉草木善飲滋人肥用者先遭芟刈

人直生禽獸橫生草木倒生只這些理橫來直撞顛倒元機

天陽主日地陰主水人合乎陰陽所以練氣還當養陰

神  
鬼全陰縮地無形僊純陽步日無影人無卻形謝影自能服鬼通

上古原生反死中古生寄死歸昇運勞生逸死末運死活不得

清閒是道拋擲無收匆忙是道狼籍不顧

論文偶錄

盛世文妙在說不出愈含蓄愈有精神衰世文妙在說得透越痛

快越多意氣

省  
讀上句便知下句難以畱人竟鹽讀數句不知何句安足發人深

性喜旁行無妨花鳥學多聞位不廢琴書若徒靜裏尚愚亦饒暗中漏洩

學者將至套盡數寫出徐有好文流露看者必初番細加評駁後不姑望優容

稍摘疵累則佳處如珙璧當前一味獎圈併最精亦糊塗並沒刻意求新加功待熟此魯史之名言有一句能回一篇之運有一篇能養一句之神此元春之妙悟

贈答詩忌乞乞人唱諛寫景詩忌詭艷女遺身

意貴申兩目一視句貴別十指參差

知性可與同居相知太暱每多頌而少規獨得難以語人所得不

乾坤正氣集 卷四百七十一

廣或矚高而手棘

文章只有痛癢功夫貴在收拾

居家偶錄

氣  
豪傑事父母大處不差難承瑣碎賢達處弟兄貨貝可恬難融意

婦人長舌鎮以靜默尚口乃窮奴僕驕橫卽與遣逐姑息養患

教誨是父兄身上事富貴是子弟命裏事

情通骨肉恃理則乖鐵鑄精神非貧不練

金錢神物也惡靜喜動是故培斂之家不患其毒而患其神當其

聚也必萬分氣力擒拿一生性命抵敵及其衰也一縱卽逝其不

潰圍而出者能幾時哉

富貴之家遠者三十年而一變近者十年而一變或六七年而一

變

父嚴則子寬夫嚴則婦寬纔非孤掌之拍父兄自幹父兄事子弟自幹子弟事始爲合禮之搖

骨肉隔居曠別宵小乘間興讒古人族食燕享非祇合歡正圖弭

豐  
小嫌索性面證莫使居間調停大謗靜聽自明弗更往來纏結橫逆出自家庭聖賢古所不免天生君子必生一頑相與磨礪感化惟有至誠不悛亦是夙業

助  
行一善共稱一善卽是折福之場忍不堪更加不堪迺爲積德之

妻妾暗我以影僮僕伺我以意消息內出逼真掩遮外人孰許喫粥喫飯是人生一大公案所以飲食無味中庸歎道不明大學  
乾坤正氣集 卷四 四十七  
嗟心不正始知忽略三餐真終身之罪過也

涉世偶錄

涉世但論當世盛衰各際其時涉世譬如涉川風波卻好自耐君子之道自生消息喫緊防微消息之道不恕君子怡然聽命禍福如狂風驟雨當御之有道消息如寒暑晝夜雖百計何辭劫灰遭大氣數卽世尊亦低其眉尺水有小乾坤惟神龍自寬其宅

宦途約可數年將前後不官之日月恁地拋荒太平非可常保持學究不療之文章何裨理亂

鴻材天所篤生樸誠我可預辦

苞苴不出境廉靜只在專城加派吸民膏痛癢直關邊塞

果能性近膏脂莫怪狼貪毒詭自揣情乖阿堵休辭蟬露饑號

清廉貪濁各極其致不惠不 斷無是理

天下事儘有胡做不得孔孟不能發明王之夢管葛不能正一統之動然而耕稼陶漁感通自在南海託幼安而避亂盜賊敬巨伯而班軍不亦可乎

天下事儘有逃遁不得便可立地決絕挺起脊梁掀著鬚眉濟不濟落得轟轟烈烈

鬪風未到江心收帆將得入港儘教魔蝎宮飛來已辦安樂窩相待

乾坤正氣集

卷四百七十二

十

09972

溫寶忠先生遺稿卷六

涇縣潘錫恩校



